



UPA 2026/123

4/6-2026

Pipaluk Olsen

Nuugaatsiaq Illorsuillu siunissaat pillugu apeqquteqaat aallaavingalugu oqallisissiatut siunnersuut
(Inatsisartunut ilaasortaq Aqqalu C. Jerimiassen, Atassut)

Inatsisartunut ilaasortap Aqqalu C. Jerimiassenip oqallissaarummik matuminnga qaqitsineranut qujanaq. Oqallisissiaq inoqarfinnut innuttaasut annilaarnartumik, kingunerlutsitsinermillu pisumik pinngitsaalisamik qimanneqartunut tungassuteqarmat, oqallisigissallugu artornarpoq.

Siullermik innuttaasut Karrat Kangerluani pisunit eqqugaasimasut Demokraatinit misiginneqatigingarpagut. Annaasaq kisitsisinngortinneqarsinnaanngitsoq imaluunniit pilersaarutinngortinneqarsinnaanngitsoq pineqarpoq.

Tamannarpiaq pillugu oqallinneq manna ataqqinnittumik, isumassuisumik, akisussaassuseqartumillu ingerlanneqarnissaa Demokraatinut aalajangiisuullunnarpoq. Nuugaatsiap aamma Illorsuit siunissaat oqallisigitillugit inuit inuuneri oqallisigaagut. Uanilu qulartoqassanngilaq. Inuit inuunerinik isumannaatsuutitsineq, illersuinerlu inuussutissarsiuutinik ineriartortitsinermi, nunasittarnermit imaluunniit aningaasatigut periarfissanit salliunneqartuaannassapput.

Nuugaatsiaq aamma Illorsuit suliatut ataatsitut isigineqannginnissaannut isumaqataavugut. Sumiiffimmi pissutsit, pisut, kingunerilu assigiinngitsorujussuupput. Oqallisiginerani sumiiffiit immikkoortissinnaassallugit naleqqullunilu pisariaqarpoq. Oqallinnerilli immikkoortikkaluaaraanni, tungaviit assigiittariaqarput.

Aallaavik Demokraatinut ersarippoq. Sumiiffimmi qaqqap sisoorsinnaanera aamma malissuaqarsinnaanera suli annertuumik nalorninartillugu, siumullu oqaatigineqarsinnaatinnagu innuttaasut, suliffeqarfiit imaluunniit oqartussat kikkullunniit sumiiffimmut utissanngillat. Suliatigut naliliinerit navianartoqartoq tikkuaagaangata, taakkua pimoorullugit tiguneqartassapput. Taamani eqqugaasut, siunissamilu eqqugaasinnaasut pillugit taamaliortariaqarpugut.

Ilutigisaanik siunissamut isiginissamik, ineriartortitsinissamillu kissaateqarnek paasinarluinnarmat oqaatigissallugu pingaaruteqarpoq. Inuussutissarsiuutitigut periarfissat pigineqartillugit atorluarnissaannik kissaateqarnek taamatulli ippoq. Kisianni ineriartortitsinermi isumannaassuseq akigineqanngisaannarsinnaavoq. Suliffiit, aningaasaqarnermullu tungasut inuup inuuneranik annaasaqaratarsinnaanermut oqimaaqatigiissinneqanngisaannassapput.

Tamanna pillugu Demokraatit isumaqarput, Nuugaatsiamut aamma Illorsuarnut siunissamut isumaliutiginninnerit sulluunniit upalungaarsimanermik, nunallu qanoq issusaanik naliliinernik



aallaaveqassasut. Naliliinerit piffissap ingerlanerani allanngussappata soorunalimi ilanngunneqassapput. Kisianni aarlerinartoq qaffasissutut nalilerneqartillugu, mianersorneq tunngaviusariaqarpoq.

Imaangilaq qaqugumorsuaq periarfissaqartitsissanngitsugut. Imaappoq, ineriartortitsinissaq illersorneqarsinnaasumik pisinnaatillugu aatsaat ingerlariaqqittassasugut. Ineriartortitsineq upperinninnermik aamma neriuuteqarnermik pinnani, ilisimasanik tunngaveqassaaq.

Suliaq manna Demokraatinut akisussaaffimmut tunngassuteqarpoq. Eqqugaareersunut akisussaaffeqarneq. Kingunerinik sulii atugaqarlutik inuusunut akisussaaffeqarneq. Inuillu toqqutigeratarsinnaasaannik inissinneqanngisaannarnissaannik inuiaqatigiittut akisussaaffeqarneq.

Tamanna pillugu ineriartortitsinissamik, siunissamullu kissaateqarneq sakkortullunilu paasinaraluartoq isumannaatsuunerup, inuullu inuunerata salliunneqartuaannarnissaannik aalajangiusimalluta nangillugu oqallinnissarput qilanaaraarput.